



ДЖЕКИ ЧАН – МАҢҒЫСТАУДА

ӘЛЕМГЕ ӘЙГІЛІ АКТЕР, РЕЖИССЕР, ПРОДЮСЕР, ЖЕКПЕ-ЖЕК ӨНЕРІНІҢ ШЕБЕРІ ДЖЕКИ ЧАН ӨНІРГЕ АРНАЙЫ КЕЛДІ. ОЛ ХАЛЫҚАРАЛЫҚ «ДОСПЕХИ БОГА 4: УЛЬТИМАТУМ» КӨРКЕМ ФИЛЬМІНІҢ ТҮСІРІЛІМІНЕ ҚАТЫСУ ҮШІН МАҢҒЫСТАУҒА ТАБАН ТІРЕДІ. МӨРТЕБЕЛІ МЕЙМАНДЫ МАҢҒЫСТАУ ОБЛЫСЫНЫҢ ӘКІМІ НҮРДӘУЛЕТ КИЛЫБАЙ ҚАРСЫ АЛДЫ. КЕЗДЕСУ БАРЫСЫНДА ТАРАПТАР ХАЛЫҚАРАЛЫҚ КИНОЖОБАНЫҢ ӨНІР ҮШІН МАҢЫЗЫ МЕН ОНЫҢ ТУРИЗМГЕ БЕРЕТІН МҮМКІНДІКТЕРІН ТАЛҚЫЛАДЫ.



Бұл – Маңғыстау үшін ғана емес, тұтас Қазақстан үшін маңызды оқиға. Себебі әлемдік кино индустриясының назарын аударған жаңа фильмнің негізгі түсірілім орындарының бірі ретінде Маңғыстаудың інжу-маржаны саналатын Бозжыра шатқалы таңдалды. Ақ борлы алып жартастар мен қайталанбас табиғи көріністері арқылы әлемді таңғалдырған Бозжыра енді халықаралық кино арқылы миллиондаған көрерменге жол тартпақ.

Облыс әкімі Нұрдаулет Килыбай мұндай ауқымды жобалар Маңғыстаудың туристік әлеуетін арттырып қана қоймай, өңірге инвестиция тартуға және халықаралық деңгейдегі танымалдығын күшейтуге серпін беретінін айтты. Джеки Чан қонақжайлық үшін ризашылығын білдіріп, Маңғыстаудың табиғаты ерекше әсер қалдырғанын жеткізді.

Сонғы жылдары Маңғыстау халықаралық туристер мен кинематографистердің қызығушылығын жиі аударып келеді. Бұған дейін өңірде халықаралық ақпараттық турлар ұйымдастырылып, Netflix платформасына арналған жобалар да түсірілген болатын. Енді әлемдік кино аңызы Джеки Чанның қатысуымен түсірілетін фильм Маңғыстауды жаһандық аудиторияға тағы бір қырынан танытуға мүмкіндік бермек.

«Доспехи Бога 4: Ультиматум» жобасы Қазақстан Республикасы Мәдениет және ақпарат министрлігінің қолдауымен жүзеге асырылуда. Фильмді қазақстандық «Soleim Entertainment» компаниясы түсіреді.

«МАҢҒЫСТАУ» АҚПАРАТ

ӘЛЕМ ТУРИСТЕРІНІҢ НАЗАРЫНДАҒЫ ӨНІР

СОҢҒЫ ЖЫЛДАРЫ МАҢҒЫСТАУ ӨНІРІ ҚАЗАҚСТАНДАҒЫ ТУРИЗМНІҢ ЖАҢА НҮКТЕСІНЕ АЙНАЛЫП КЕЛЕДІ. БІР КЕЗДЕРІ ТАБИҒАТЫ ЕРЕКШЕ БОЛҒАНЫМЕН, ТУРИСТЕР СИРЕК БАРАТЫН АЙМАҚ САНАЛСА, БҮГІНДЕ ӨНІРГЕ ӘЛЕМНІҢ ТҮКПІР-ТҮКПІРІНЕН САЯХАТШЫЛАР АҒЫЛЫП ЖАТЫР. МҰНЫҢ БАСТЫ СЕБЕБІ – БІРЕГЕЙ ТАБИҒИ ЛАНДШАФТТАР, ТАРИХИ-МӘДЕНИ МҰРАЛАР, ХАЛЫҚАРАЛЫҚ БАҒЫТТАРДЫҢ КӨБЕЮІ ЖӘНЕ ТУРИЗМДІ ДАМУҒА БАҒЫТТАЛҒАН ЖҮЙЕЛІ ЖҰМЫСТАР.



Қазақстан Республикасы Ұлттық статистика бюросының мәліметіне сәйкес биылғы жылдың алғашқы үш

айында ғана Маңғыстау облысына 67 мыңнан астам турист келген. Оның төрт мыңға жуығы – шетелдік қонақтар. Бұл көрсеткіш өңірге деген

қызығушылықтың жыл өткен сайын артып келе жатқанын көрсетеді.

Мамандардың айтуынша, бұл – тек маусым басындағы көрсеткіш. Алдағы жазғы демалыс кезеңінде туристер саны бірнеше есе өседі. Биыл Маңғыстауға 500 мыңға жуық турист келеді деген болжам бар, оның ішінде 100 мыңға жуығы шетелдік саяхатшылар болуы мүмкін.

Туристердің көбеюі өңірдегі қызмет көрсету саласының да дамуына серпін беріп отыр. Қазіргі таңда облыста 108 орналастыру орны жұмыс істейді. Қонақ үйлер, демалыс базалары мен басқа да туристік нысандар бір мезгілде 8 793 адамды қабылдай алады.

Сонғы жылдары жаңа қонақүйлердің салынуы, сервистің жақсаруы және жол инфрақұрылымының дамуы туристер үшін қолайлы жағдай қалыптастыруға мүмкіндік берді. Әуе қатынасының кеңеюі де – туристік ағымды арттырған маңызды факторлардың бірі. Бүгінде Ақтау халықаралық әуежайынан 23 әуе рейсі жүзеге асырылады. Оның 9-ы ішкі, ал 14-і халықаралық бағыттарға қатынайды.

Жалғасы 2-бетте

• БҮГІНГІ САНДА

БЕЙЖІНДЕГІ БІЛІМДІ БОЙЖЕТКЕН



» 9

ТӨРТКҮЛ ДҮНИЕ КӨЗ ТІККЕН ӘЛЕМ ЧЕМПИОНАТЫ



» 10

МАҢҒЫСТАУДА СУҒА ТҮСУГЕ БОЛМАЙТЫН 10 ОРЫН БАР

Ақтау қаласы бойынша:

- 4 шағын аудандағы "Caspian Rivera" қонақ үйінен 5 шағын ауданда
- Маяк жағалау аймағындағы су каналы
- Шора су каналы

Түпқараған ауданы бойынша:

- Ақтау-Форт Шевченко тас жолындағы 43-ші шақырымдағы жағалау
- 64-ші шақырымдағы "Голубая бухта"
- 86-шы шақырымдағы Саура
- Форт-Шевченко қаласынан 30 шақырымдағы Тамшаны жағалауы

Қарақия ауданы бойынша:

- Жыланды
- Тоқмақ жерлері

Мұнайлы ауданы бойынша:

- Батыр ауылының солтүстік-шығысынан 7 шақырым жердегі Уранды қарьері

Төтеншеліктер суға түсер алдында арнайы рұқсат етілген орындан анықтап қауіпсіздік ережелерін сақтауға шақырады.

Ақтау қаласы бойынша:

Түпқараған ауданы бойынша:

Қарақия ауданы бойынша:

Мұнайлы ауданы бойынша:

СУДАҒЫ САЛҒЫРТТЫҚТЫҢ САЛДАРЫ АУЫР

АПТАП ЫСТЫҚТА ТЕҢІЗ ЖАҒАЛАУЫ МЕН СУ АЙДЫНДАРЫНА ДЕМАЛУШЫЛАР ТОЛАССЫЗ АҒЫЛАДЫ. ӘСІРЕСЕ КАСПИЙ ЖАҒАЛАУЫНДА ШОМЫЛУ МАУСЫМЫ БАСТАЛЫСЫМЕН ТҰРҒЫНДАР МЕН ТУРИСТЕРДІҢ ҚАРАСЫ АРТТЫ. АЛАЙДА ДЕМАЛЫС МАУСЫМЫМЕН ҚАТАР ҚАЙҒЫЛЫ ОҚИҒАЛАРДЫҢ ДА ЖИІЛЕЙТІНІ ӨКІНІШТІ.

Өңірде суға шомылу маусымы басталғанына небәрі бір ай болса да, осы уақыт ішінде 11 адам суға кетіп, көз жұмды. Қазіргі уақытта төтенше жағдайлар қызметінің мамандары теңізден тағы бір адамды іздестіруде. Бұл көрсеткіш өткен жылдың осы кезеңімен салыстырғанда бірнеше есе жоғары. Мәселен, 2025 жылдың дәл осы уақытында суға кеткендер саны екі адам болған. Бұл статистика өңірдегі судағы қауіпсіздік мәселесінің әлі де өзекті екенін көрсетеді.

Жыл сайын қайталанатын қайғылы жағдайлар тұрғындардың қауіпсіздік талаптарын елемейтін туындайтынын құтқарушылар да жиі айтады. Соңғы бес жылдың көрсеткіштеріне көз жүгіртсек, мәселенің тұрақты сипат алғанын байқауға болады. 2022 жылы Маңғыстау облысында 11 адам суға кетсе, 2023 жылы бұл көрсеткіш 13 адамға жеткен. 2024 жылы 14 адам суға кеткен болса, 2025 жылы 11 адам тіркелген. Ал биыл шомылу маусымы әлі аяқталмай жатып, суға кеткендердің саны тағы 11 адамға жетіп отыр. Оның үстіне, теңізден бір адамды іздеу жұмыстары әлі жалғасуда.

Мамандардың айтуынша, қайғылы оқиғалардың басым бөлігі арнайы жабдықталмаған, шомылуға рұқсат етілмеген орындарда болады. Мұндай жерлерде құтқарушылар кезекшілік атқармайды, қауіпсіздік белгілері мен ескерту тақтайшалары орнатылмаған. Кейбір аймақтарда су түбі күрт тереңдеп кетеді немесе ағыс күштірек болады. Мұндай қауіптерді көпшілік ескере бермейді.

Өкінішке қарай, қайғылы жағдайлар тек рұқсат етілмеген жерлерде ғана емес, ресми жағажайларда да тіркеліп жатады. Бұған көбіне адамдардың өз қауіпсіздігіне салғырт қарауы себеп болады. Кейбірі белгіленген аумақтан асып кетсе, енді бірі мас күйінде суға түседі немесе жүзу қабілетін дұрыс бағаламайды. Балаларды қараусыз қалдыру да – орны толмас өкінішке әкелетін жағдайлардың бірі.

Құтқарушылардың айтуынша, суға кетудің басты себептерінің қатарында қауіпсіздік ережелерін сақтамау, рұқсат етілмеген жерлерде шомылу, алкогольдік ішімдік ішіп суға түсу, балаларды ересектердің қарауынсыз қалдыру және ауа райының қолайсыз кезінде теңізге кіру бар. Маңғыстау облысының Төтенше жағдайлар департаменті тұрғындарды тек арнайы жабдықталған жағажайларда ғана демалуға шақырады. Сонымен қатар суға түсер алдында ауа райын ескеріп, дауыл туралы ескертулерге назар аудару қажет екенін еске салады.

Мамандар қарапайым ережелердің өзі адам өмірін сақтап қалатынын айтады. Су айдынында ұзақ жүзбеу, белгіленген аумақтан шықпау, үрлемелі матрасармен ашық теңізге бармау, балаларды бір сәтке де қараусыз қалдырмау – әрбір демалушының есте ұстауы тиіс қағидалар. Каспий теңізі сырт көзге тыныш көрінгенімен, оның астарында адам өміріне қауіп төндіретін кәтерлер аз емес. Кенеттен өзгеретін ағыс, тереңдіктің күрт ауысуы, желдің күшеюі кез келген адамның өміріне қауіп төндіруі мүмкін.

Жазғы демалыс қуаныш пен жақсы естеліктерге толы болуы тиіс. Ол қайғылы оқиғамен аяқталмауы үшін әр адам өз қауіпсіздігіне жауапкершілікпен қарауы қажет. Себебі су кешірмейді. Бір сәттік бейқамдық бүтін бір отбасының өмірін өзгертіп жіберуі мүмкін.

ӨЗ ТІЛШІМІЗ

mangystau.gazeti

Mangystau Gazeti

xat.mangystau@gmail.com

Otpannews.kz